

ԳՐՔԵՐԻ ՇՆՈՐՀԱՆԴԵՍ ՄԱՅՐ ԱԹՈՌՈՒՄ

Մարտի 28-ին Մայր Աթոռ Սուրբ Էջմիածնում տեղի ունեցավ «Կրթությունը՝ զարգացման նախապայման» ժողովածուի և «Կրթության իրավունք» գրքի շնորհանդեսը՝ կազմակերպված Եկեղեցիների Համաշխարհային Խորհրդի Հայաստանյան միջեկեղեցական բարեգործական Կլոր սեղան հիմնադրամի կողմից:

«Կրթությունը՝ զարգացման նախապայման» ժողովածուն ներկայացնում է ԵՀԽ Հայաստանյան Կլոր սեղան հիմնադրամի կողմից՝ Կրթական և զարգացման ծրագրի շրջանակներում 2007 թ. հունիսի 8-10-ը Ծաղկաձորում կազմակերպված «Կրթությունը՝ զարգացման նախապայման» կրթական երիտասարդական համագումարի ընթացքին ներկայացված զեկուցումները և համագումարի արդյունքների ամփոփումը: Ձեկուցումները հիմնականում արծարծում են կրթական բարեփոխումներին, արտադպրոցական և միջին մասնագիտական կրթությանը, քրիստոնեական դաստիարակությանը, կրթական ոլորտում Հայաստանի Հանրապետության պետական տարբեր մարմինների, Եկեղեցու և հասարակական կազմակերպությունների համագործակցությանն առնչված խնդիրներ:

Ժողովածուն պատրաստվել է Եկեղեցիների Համաշխարհային Խորհրդի Հայաստանյան միջեկեղեցական բարեգործական Կլոր սեղան հիմնադրամի նախաձեռնությամբ և հրատարակվել Եկեղեցական զարգացման ծառայության՝ Գերմանիայի «Բողոքական եկեղեցիների միություն» կազմակերպության (EED) ֆինանսական օժանդակությամբ:

«Հետադարձ կապերի հանրամատչելի իրավաբանական գրադարան» շարքի «Կրթության իրավունք» գիրքը (հեղինակ՝ Հայկ Խեմչյան և ընդհանուր խմբագիր՝ ՀՀ դատավորների միության նախագահ Հրաչիկ Սարգսյան) հրատարակվել է ԵՀԽ Հայաստանյան Կլոր սեղան հիմնադրամի հովանավորությամբ: Ձեռնարկում հարցերի ու պատասխանների միջոցով հանրամատչելի ներկայացված են կրթության իրավունքին վերաբերող քաղաքացիներին առավել հուզող հարցերի պարզաբանումներ: Պատասխանների վերջում նշվում են այն իրավական ակտեր և դրա համապատասխան հոդվածը, որից քաղված է հարցի պատասխանը: Գրքում թվարկվում են նաև կրթության ոլորտը կարգավորող ներպետական և միջազգային փաստաթղթերը, որոնք լավագույնս բնորոշում են կրթության ոլորտում պետության որդեգրած քաղաքականության էությունը, ինչպես նաև կրթության հարցերում միջազգային հանրության առջև Հայաստանի ստանձնած պարտավորությունները:

Շնորհանդեսը բացվեց Տերունական աղոթքով, ապա ներկաներին ողջույնի խոսքով դիմեց Մայր Աթոռ Սուրբ Էջմիածնի դիվանապետ Տ. Արշակ եպիսկոպոս Խաչատրյանը: Սրբազանը, փոխանցելով Ամենայն Հայոց Հայրապետի օրհնությունն ու գնահատանքը, անդրադարձավ կրթության կարևորությանը, հոգևոր-բարոյական

դաստիարակության խնդիրներին և հասարակության մեջ հոգևոր արժեքների գործածման անհրաժեշտությանը:

Հրատարակությունների առիթով իրենց մտորումներն արտահայտեցին ԵՀԽ Կլոր սեղան հիմնադրամի հոգաբարձուների խորհրդի անդամ Ս. Հովակիմ վրդ. Մանուկյանը, Ս. Կաթողիկե եկեղեցու հոգևոր հովիվ (Կոտայքի թեմ) Ս. Կյուրեղ քին. Տալանը, ԵՀԽ Կլոր սեղան հիմնադրամի հոգաբարձուների խորհրդի անդամ Ս. Վահրամ քին. Մելիքյանը, Կրթության ազգային ինստիտուտի Դաստիարակության և լրացուցիչ կրթության բաժնի վարիչ Մելանյա Դավթյանը, ՀՀ Կրթության և գիտության նախարարության Նախնական և միջին մասնագիտական կրթության վարչության պետ Արտակ Աղբալյանը, Արմավիրի մարզի Առաջին ատյանի դատարանի նախագահ, ՀՀ դատավորների միության նախագահ Հրաչիկ Սարգսյանը:

Շնորհանդեսն եզրափակվեց ԵՀԽ Կլոր սեղան հիմնադրամի տնօրեն Կարեն Նազարյանի խոսքով:

*ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*